

RTR cun premiera mundiala

■ (cp) **Il 12 da zercladur 2014 ent-schaiva en Brasilia il campinadi mundial da ballape. Radiotelevisiun Svizra Rumantscha (RTR) rapporta live e lartg da quest event da sport gigantic. La puschida da RTR or da la Brasilia cuntogna quest onn perfin ina premiera mundiala.** La fevra crescha. En paucs dis cumenza il «Campinadi mundial da la Fifa 2014» en Brasilia. Da la partida è era la squadra naziunala svizra che dat ses emprim gieu da pre-gruppa questa dumengia, ils 15 da zercladur. Radiotelevisiun Svizra Rumantscha (RTR) è preschent en Brasilia cun dus reporters da sport e tegna al current da tut quai che curra e passa tar la squadra naziunala a Porto Seguro. Ils dus reporters da RTR, Roman Dobler ed Andreas Wieland, vegnan dasper il sport er a rapportar dal mintgadi brasilian ed els vegnan a raquintar istorgias ed istorgettas enturn il campinadi.

Dobler e Wieland enstagl Thurnheer

Il focus principal drizzan ils reporters però sin ils gieus da la squadra naziunala da la Svizra. E quels commenteschan els per l'emprima giada live en furma televisiva. RTR emetta numnadain per l'emprima giada insumma gieus da ballape cun commentari rumantsch – ina premiera mundiala. Tut ils gieus èn da vesair e d'udir via video-livestream sur la pagina www.rtr.ch, saja sur tablet, computer ubain via streaming perfin sin la televisiun gronda en stiva. La puschida datti per tut ils gieus svizzers. E tgi sa, sche la squadra da Hitzfeld ha propi grond success, alura emetta RTR

perfin ils 13 da fanadur 2014 il final a Rio de Janeiro via livestream. Per tgi che na vul betg per forza guardar ils gieus, mabain be tadlar ils commentaris live, quel po sa chapescha far quai vinavant en il Radio Rumantsch.

«Perfin mia gruppa da sang è positiva»

Ils gieus en Brasilia èn durant quest turnier per part tard la saira u perfin la notg. Il Radio Rumantsch garantescha però da metter mintga damaun sin il current sias audturas e ses auditors. Mintgadi a las 07:20 datti in update dals gieus da la notg passada ed ina survista dal plan da gieus dal di actual. Sa chapescha vegnan qua u là era a pled ils Ronaldos, Messis e Shakiris. Ils anteriurs stars ed experts da ballape vegnan per la paja a pled durant l'entir campinadi en las µ«Sabientschas da ballape per rumantsch». Il Radio Rumantsch ha fatg ina selecziun da citats divertents sur dal ballape ed ha translata quels per rumantsch. P. ex. er il citat da Toni Polster, anteriur ballapedist austriac: «Jau sun in optimist, perfin mia gruppa da sang è positiva.»

Radio Rumantsch

A partir dals 13 da zercladur, mintgadi, 07:20 ed a las 17:20.

www.rtr.ch

Dossier «Campinadi mundial da la Fifa 2014», t.a. cun video-livestream da mintga gieu da la squadra naziunala svizra. Il dossier cuntogna era ina concurrenza, nua ch'i dat da gudagnar numerus radios DAB+ en colurs brasilianas.



Andreas Wieland (sanester) e Roman Dobler (dretg) rapportan live dal campinadi mundial da ballape a Brasilia.